

**SARAJEVO** Suđenje nekadašnjem članu antikorupcionog tima

# Bivši federalni tužilac priznao prevaru u službi

Sead Temim potpisao sporazum i pristao na uvjetnu kaznu • Unosio neistinite podatke o troškovima službenih putovanja i oštetio Federalno tužilaštvo za 23.903 KM

Sead Temim (54), bivši tužilac Federalnog tužilaštva i bivši predstavnik BiH u Stručnom tijelu Vijeća Evrope za borbu protiv korupcije (GRECO) koji je optužen za krivično djelo prevare u službi, potpisao je s Kantonalnim tužilaštvom sporazum o priznanju krivice.

## Vratio novac

Prema sporazumu, koji je jučer razmatran pred Igorom Todorovićem, sudijom Općinskog suda u Sarajevu, Temim bi bio osuđen na dvije godine zatvora pod uvjetom da za tri godine ne počini novo krivično djelo. Također je dužan platiti 1.050 KM troškova vještačenja i prijevoda finansijskih dokumenata.

Temim koji je, prema optužnici, unoseći neistinite podatke o troškovima službenih putovanja, oštetio Federalno tužilaštvo za 23.903



Optuženi Temim po izlasku iz sudnice nakon razmatranja sporazuma

(Foto: S. Safetović)

## Naplatio, a nije bio na sjednici

Prema optužnici Sead Temim je počinio krivična djela prevare u službi od 2004. do 2010. godine. Jedan od primjera iz optužnice jeste da je Temim kao član Ekspertnog tima u Stalnoj delegaciji BiH u grupi zemalja protiv korupcije sačinio neistinit nalog za službeno putovanje radi sastanka radne

grupe u Strazburu u periodu od 18. do 23. novembra 2006. godine.

Nalog da mu obračunaju i isplate troškove službenog putovanja u iznosu od 1.075,70 KM dostavio je Odsjeku za računovodstveno-materijalne poslove iako je znao da sjednica nije uopće održana.

KM, prije potpisivanja sporazuma uplatio je iznos za koji se tereti te je imovinsko-pravni zahtjev oštećena institucija povukla.

- Pri potpisivanju sporazuma Tužilaštvo KS imalo

je u vidu olakšavajuće okolnosti da je optuženi uplatio iznos od 23.903 KM za koji je oštetio Federalno tužilaštvo, da je oženjen i otac troje djece te da se tokom cijelog postupka držao korektno i da nije ranije osuđivan. Imali smo u vidu i otežavajuće okolnosti da je djelo izvršeno u posebnom svojstvu i s obzirom na funkciju optuženog u GRECO organima. Smatramo da je kazna adekvatna i da će se ovom sankcijom postići svrha kažnjavanja - kazao je jučer tužilac Aziz Jahjaefendić iznoseći završne riječi.

## Ponosan na rad

Almir Dautbegović, branilac optuženog, kazao je da je njegov branjenik potpisao sporazum o priznanju krivice jer je obolio i emotivno teško podnosi suđenje.

- Da li smo uvjerali Sud da ne postoji umišljaj za djelo, ne možemo znati jer smo potpisali sporazum - kazao je Dautbegović.

Optuženi se složio sa svojim braniocem.

- Ponosan sam na svoj rad i ne smatram sebe čovjekom koji čini koruptivna krivična djela. Sporazum sam potpisao jer hajka koja je pokrenuta protiv mene emotivno me pogodila i želim da se ovo završi - kazao je Temim. Presuda će biti donesena naknadno.

Am. KOVAČ